

PATRIARCHATUS CONSTANTINOPOLITANUS.

LIBER NONUS.



E Asia, quæ ad Tanaïm flumen Europam attingit, deinceps nobis dicendum est, saltem quoad illam partem, quæ Christi fidem amplexa tribus Sedibus Patriarchalibus, quamplurimis Metropolitibus, innumerisque Episcopatibus insignita fuit. Nomen habuit, si Eustathio^a credimus, ab *Asio Atyis filio*, vel ab *Asia matre Promethei*, authore Lycophrone: vel quod multas paludes habeat, ideoque lutosa sit: *ἄσις* enim idem est quod *ἄσος*, id est, lutum, apud Homerum. Quidam verò etiam Atticam ajunt olim *Asiada* esse vocatam, & nonnulli *Asium* Philosophum dedisse Troi custodiendum palladium ex ligno fabrefactum:

I.
ASIAE DESCRIPTIO.

^a Eustathius ad Dionysium.

Troem verò in honorem illius viri, regionem prius à se Epirum dictam, *Asiam* vocasse: à qua reliqua inde regio, ut à præstantiori parte, nomen accepit. Vult tamen Stephanus^b ab Asia civitate Lydiae universam Asiam nuncupatam fuisse. Sed misso nomine, eam primùm à Lucio Scipione, qui ob id Asiaticus vocatus est, Romanorum legibus subactam fuisse dicamus: mox à Consulibus, & postea à Proconsulibus est administrata: demum translato Imperio in Orientem à Constantino magna ex parte cum Thracia Præfecto Prætorio Orientis subdita. Eum quinque majores Diœceses administrasse in Notitia Civili Imperii Romani dicitur, nimirum Asiam, Pontum, Thraciam, Orientem & Ægyptum: de duabus ultimis, ubi de Patriarchatibus Antiochiæ, Jerosolymorum, & Alexandriae sermo nobis erit. Jam de tribus primis scribendum duximus.

^b Stephanus de Urbibus.

Asia quidem multifariam sumitur: nunc pro una ex quatuor mundi partibus: aliàs pro ea tantùm Provincia, quæ inter Lydiam & Cariam ad mare Ægeum sita à Proconsule regebatur: tandem pro una ex quinque Diœcesibus Præfecto Prætorio Orientis subditis. Hoc ultimo modo accepta in has Provincias undecim apud Notitiam Civilem Imperii Romani sic dividitur, nempe Asiam Proconsularem, Pamphyliam, Hellespontum, Lydiam, Pisidiam, Lycaoniam, Phrygiam Pacatianam, Phrygiam Salutarem, Lyciam, Cariam, & Insulas. Asia Proconsularis jam descripta est.

II.
ASIAE PROCONSULARIS DESCRIPTIO, MINORISQUE PROVINCIÆ.

Hellespontus terminatur ab Oriente Phrygia Pacatiana, & parte Salutaris, à Septentrione Propontide, ab Occidente freto Hellesponti, à Meridie mari Ægeo.

Phrygia Salutaris inter Hellespontum & Pacatianam à Septentrione, inter eandem Pacatianam & Lydiam ab Ortu posita, habet Asiam à Meridie, & mare Ægeum ab Occidente.

Lydia clauditur Asia à Meridie, Phrygia Pacatiana ab Ortu & Septentrione, & Phrygia Salutari Asiaque propria ab Occasu.

Caria ab Ortu Lyciam habet, à Septentrione Asiam & Lydiam, ab Occidente mare Icarium seu Ægeum, & à Meridie mare Rhodium.